



Communicaziun a las medias

Data: 18 da settember 2020

Il Cussegl federal ha decidì davart dus engrondiments da territoris da skis planisads en Engiadina Bassa

Il chantun Grischun ha adattà ses plan directiv en vista als engrondiments da territoris da skis planisads a Scuol ed a Samignun. A chaschun da sia sesida dals 18 da settember 2020 ha il Cussegl federal approvà cun cundiziuns la determinaziun da l'engrondiment dal territori da skis a Samignun e sistì l'examinaziun da l'engrondiment dal territori da skis a Scuol sin dumonda dal chantun.

Cun l'adattaziun qua avant maun da ses plan directiv vul il chantun Grischun stgaffir las premissas per engrondir ils territoris da skis da Scuol e da Samignun. Las destinaziuns e las pendicularas reageschan sin la segirezza da naiv mancanta en regions pli bassas cun vulair render accessibels da nov territoris pli auts e pli segirs areguard la naiv.

L'engrondiment dal territori da skis da Samignun pertutga il territori Ravaischer Salaas, ina chombra natirala che n'era fin ussa betg rendida accessibla e che cunfinescha cun il territori da skis existent. Sin il stgalim dal plan directiv n'èsi strusch pussaivel da giuditgar, tge consequenzas ch'il project vegn ad avair per spazis da viver impurtants dad animals selvadis e per la cuntrada. Pervia da quai ha il Cussegl federal approvà l'adattaziun dal plan directiv sut la cundiziun che l'uschenumnada examinaziun preliminar tar l'examinaziun ecologica (EE) che sto vegnir fatga mussia ch'igl è pussaivel da realisar l'engrondiment en moda confurma a la lescha en quai che riguarda la protecziun da las spezias e da la cuntrada. Il Departament federal per ambient, traffic, energia e communicaziun vegn a decider, sche la cundiziun è ademplida e sche l'approvaziun dal project daventa obsoleta en il plan directiv.

En cas da l'engrondiment dal territori da skis a Scuol planisà dal chantun sa tracti d'ina avertura nova da la Val Tiral. Pervia da las consequenzas probablmain considerablas sin ils spazis da viver d'animals selvadis protegids (pertutgads fissan tranter auter lieurs alvas, urblaunas sco er il capricorn alpin) ha la Confederaziun grondas resalvas ch'in project da pendiculara en quel territori saja cumpatibel cun il dretg federal. Pervia da quai ha il Cussegl federal sistì l'approvaziun dal plan directiv sin dumonda dal chantun. Quai pussibilitescha al



chantun, a la regiun, a la vischnanca ed a las pendicularas da sclerir pli precis en ina consideraziun cumplessiva, sch'il territori è adattà per l'utilisaziun planisada tras il turissem da skis sut l'aspect da la gronda impurtanza sco spazi da viver per spezias d'animals selvadis protegids.

Link:

<https://www.are.admin.ch/are/de/home/raumentwicklung-und-raumplanung/strategie-und-planung/kantonale-richtplaene/richtplanung-kanton-graubuenden.html>

Per scleriments:

Ueli Wittwer, schef suppleant da la secziun Planisaziun directiva, Uffizi federal da svilup dal territori ARE
tel. 058 465 06 22, ueli.wittwer@are.admin.ch

Departament responsabel:

Departament federal per ambient, traffic, energia e comunicaziun (DATEC)